

# ՄԵԾԱՐԱՆՔԻ ԸՆԴՈՒՆԵԼՈՒԹԻՒՆ ՏԻԿ. ԱՆԻ ԱՅՆԻԼԵԱՆ -ՉՈԼԱԳԵԱՆԻ

«Ուստի, իմ սիրելի եղբայրներս, հաստատո՛ւն եւ անշարժ կեցեք եւ ամեն ատեն աւելցէ՛ք Տէրոջը գործին մէջ, գիտնալով թէ ձեր աշխատութիւնը պարապ չէ Տէրոջմով» (Ա. Կորնթ. 15:58):

Ընկերային ծառայութեան գործը եկեղեցիին հաւատքը ցոլացնող անհրաժեշտ վկայութիւնն է: Ան անբաժան մասնիկն է եկեղեցիի առաքելութեան եւ քարոզութեան: Այդ սուրբ գործին մէջ կայ՝ Տէրոջ պատուէրը կատարելու եւ Անոր սէրը բաշխելու ջանք, ծրագիր ու աշխատանք:

Կիրակի 18 Նոյեմբեր, 2012, եղաւ այն յատուկ եւ հրճուալի օրը, մեծարանքի ընդունելութիւն սարքելու այն արժանաւոր ու նուիրեալ անձին, յանձին՝ Տիկ. Անի Այնիլեան-Չոլագեանի (Տնօրէնուհի Ճինիշեան Յիշատակի Ձեռնարկի), իր 34 ամեայ անխոնջ ու անձնուրաց ծառայութեան համար իբրեւ Տնօրէն Ճինիշեան Յիշատակի Ձեռնարկի:

Մեծարանքի ընդունելութեան ներկայ էին՝ Հայ Աւետարանական Համայնքի Համայնքապետ՝ Վեր. Յարութիւն Սելիմեան, Հայ Աւետարանական Եկեղեցիներու հովիւներ, Հայ Աւետարանական Համայնքային Գործադիր Մարմինի, Մ.Ա.Հ.Ա.Ե.Միութեան Կեդրոնական Մարմինի ու Սուրիոյ Հայ Աւետարանական Կրթական Խորհուրդի անդամներ, Հայ Աւետարանական եկեղեցիներու ժողովներու ներկայացուցիչներ, Ճինիշեան Յիշատակի Ձեռնարկի խորհրդատու Մարմնի անդամներ եւ Ճինիշեան Յիշատակի Ձեռնարկի նորանշանակ Տնօրէնուհի:



Յայտագիրը սկսաւ Տիկ. Միւզան Աբարդեանի բացման ու ողջոյնի խօսքով, ուրտեղ անդրադարձաւ սոյն ձեռնարկի պատեհ ու բարեբաստիկ առիթին, ապա Օր. Սեւան Չիրիշեան սահիկներով ներկայացուց՝ Տիկ. Անի Չոլագեանի 34 ամեայ ծաւալած գործունէութիւնները Ճինիշեան Յիշատակի Ձեռնարկի աշխատանքներու հետ կապուած, ուր կը նկարագրուէր՝ Տիկ. Ա. Չոլագեանի հակիրճ կենսագրականը, կատարած ու ընդունած այցելութիւնները, մասնակցած ժողովներն ու մշակած ծրագիրները, ի նպաստ՝ Սուրիահայ ժողովուրդի զաւակներուն:

Սահիկներու ցուցադրութենէն ետք բեմ հրաւիրուեցաւ Տիար Խաչիկ Աբրիկեան՝ Ճինիշեան Յիշատակի Ձեռնարկի Խորհրդատու մարմնի ատենապետ: Ան շնորհակալութիւն յայտնեց Հայ Աւետարանական համայնքին, յատկապէս համայնքապետին, այս յատուկ առիթի ընծայման եւ ապա գնահատանքով անդրադարձաւ Տիկ. Անի Չոլագեանի 34 երկար տարիներու անձնուէր ծառայութեան, որ ի սպասս դրաւ մեր ազգի կարօտեալ ընտանիքերուն, հիւանդներուն եւ անկարներուն, միշտ հաւատարիմ մնալով Վարդան Ճինիշեանի կտակին ու սկզբունքներուն: Ապա առիթ ընծայուեցաւ Ճինիշեան Յիշատակի Ձեռնարկի նորանշանակ Տնօրէնուհի՝ Տիկ. Թալին Թօփալաքեանի, փոխանցելու իր սրտին խօսքը այս առթիւ: Ան իր խօսքին մէջ ընդգծեց, թէ՛ հաւաքուած ենք ոչ թէ ողջերթ մաղթելու Տիկ. Ա. Չոլագեանին, այլ մեծարելու անձնաւորութիւն մը, որուն կեանքը ամբողջապէս եղած է նուիրում: Ան ըսաւ. «Այսօր մենք հրաժեշտ չենք տար Տիկ. Անիին, այլ Ճինիշեան Յիշատակի ձեռնարկը կը մնայ իր տունը եւ ես անձնապէս պիտի դիմեմ իր խորհուրդներուն, որովհետեւ իր մէջ տեսայ նուիրում եւ զոհուող մարդու կերպարը, որ պիտի դառնայ պատնէշ ապագայ իմ ճանապարհին»: Ան այս առթիւ կատարեց իր յանձնառութիւնը, մնալու հաւատարիմ իրեն վստահուած պաշտօնին, հասնելու գաղութի բոլոր զաւակներուն անխտիր, ինչպէս նաեւ միշտ համագործակցութիւն ցուցաբերելով Հայ երեք համայնքներուն: Ապա ան ընթերցեց շնորհակալական նամակ մը Ամերիկայի Միացեալ Նահանգներու Ճինիշեան Յիշատակի Ձեռնարկի Տնօրէնութեան կողմէ: Այս յատուկ առթիւ ան փոխանցեց յուշանուէր մը՝ Տիկ. Ա. Չոլագեանին, Ճինիշեան Յիշատակի Ձեռնարկի եւ անոր խորհրդատու մարմնին անունով:

Այս խորհրդաւոր պահէն ետք Վեր. Համայնքապետ Յարութիւն Սելիմեան բեմ հրաւիրուեցաւ փոխանցելու իր սրտին խօսքը: Ան հանգամանօրէն ողջունեց ներկաները եւ ապա շնորհաւորեց Ճինիշեան Յիշատակի Ձեռնարկի

նորանշանակ Տնօրէնուհին, մաղթելով բեղուն ծառայութիւն յառաջիկայ տարիներուն ընթացքին: Ան իր խօսքը սկսաւ հետեւեալ գաղափարը շեշտելով՝ «Եկեղեցիին Քրիստոնէական հաւատքին, անոր քարոզութեան եւ ծառայութեան միջեւ եղած կապը առաւել եւս կը յայտնուի, երբ կը տեսնենք այդ առաքելութեան վրայ կեցող անձերուն նկարագիրը, նուիրուելու պատրաստակամութիւնը ու անոնց հաւատքի վկայութիւնը, ուր անձնուրացութեամբ եւ անխոնջ ծառայութեամբ կը հասնին կարօտեալին, անկարին եւ տկարին:

Ուստի, ընկերային ծառայութիւնը անբաժանելիօրէն կապուած է եկեղեցիին էութեան ու հաւատքին: Այսպէս, ընկերային ծառայութեան վերացումը, եւ կամ՝ անոր անտեսումը լուրջ մտահոգութիւն կը յառաջացնէ մեր հաւատքին այժմէականութեան եւ կենսունակութեան մասին»:

Ապա ան գոհունակութեամբ անդրադարձաւ ձեռնարկին տուն տուող միտք բանիին, որն էր մեծարել Տիկ. Ա. Չոլագեան: Ան դիտել տուաւ, թէ՛ Տիկ. Ա. Չոլագեանի 34 ամեայ ընդհանուր մտածողութիւնն ու պատրաստուածութիւնը ինքնին եղած էր գոհասեղանի մը վրայ դրուած այն գոհաբերեալի կերպարը, որ իր արժանիքներն ու կարողականութիւններու դրսեւորումը եղած էր միմիայն ժողովուրդին ծառայութեան, բարօրութեան ու վերելքին ի խնդիր: Վերապատուելին ընդգծեց երեք հիմնական կէտեր, Տիկ. Անի Չոլագեանի ունեցած պատրաստուածութեան իր մասնագիտութեան մարզէն ներս: Ան ըսաւ. «Տիկ. Ա. Չոլագեան ունէր աստուածաշնչական պատրաստուածութիւն, որ ստացած էր աստուածաշունչէն: Ան սնած էր աստուածաշունչ մատեանի ամէն մէկ խօսքով, հոգիով, շունչով ու մտածողութեամբ: Անոր՝ հայ Աւետարանական եկեղեցոյ զաւակ ըլլալը պատրաստեց զինք մարդուն մէջ տիպար կերպարը տեսնելու, պատրաստուեցաւ եւ իր զգայնութիւնը սրեց հանդէպ՝ կարիքին ու կարիքաւորին: Իր երկրորդ պատրաստութիւնը ակադեմական էր, յատկապէս այնպիսի օրերու մէջ, երբ ընկերային ծառայութիւնը կը կատարուէր գաղութներու մէջ սիրողական տարրողութեամբ, մասնագիտական ընկերային ծառայողներ ընդհանրապէս գոյութիւն չունէին եւ եկեղեցիներու ու այլ միութիւններու մէջ ընկերային ծառայութեան աշխատանքները կը կատարուէին աւելցած ժամանակով ու աւելցած լումայով: Տիկ. Ա. Չոլագեան ներկայացուց ընդհանուր ընդունուած ուրուագիծ մը եւ ընկերային ծառայութիւն կատարեց մասնագիտական դրուածքով ու մաշտապով: Ան տեսաւ ժողովուրդին կեանքին մէջ

բացթողումներ ու շոշափեց անկարին եւ կարօտեալին կարիքները: Ան գիտակցեցաւ, թէ՛ պէտք է շինել մարդուն մարդկայնութիւնը, վերակառուցել անոնց անհատականութիւնը, միշտ բարձր պահելով մարդուն մարդկային արժանապատուութիւնը: Երրորդ ու վերջին՝ գործին՝ վերահսկելու բարձր տրամադրութիւն: Աշխատանքը կարելի է կատարել ամէնուրեք, սակայն աշխատանքին մասնագիտութիւնն ու արդիւնաբերութիւնը իր ընդհանուր վերահսկութեան կարողականութեան մէջ է: Տիկ. Ա. Չոլագեան գիտցաւ, թէ գործ մը սկսիլ ու ընթացք առնելէ ետք, ինչպէս պէտք էր վերահսկել եւ ուղղել, միշտ աշխատակիցին մտածողութիւնն ու դատողութիւնը յարգելով: Վերապատուելին իր խօսքը փակեց հետեւեալ նախադասութիւնով՝ «Տիկ. Ա. Չոլագեան ընկերային ծառայութեան առաքելութեան համար ստեղծուած էր: Այս առաքելութիւնը մարմնացնելու համար պատրաստուեցաւ ու այս առաքելութիւնը մարմնաւորեց իր անձնուրաց նուիրուածութեամբ եւ մենք որպէս համայնք լիիրաւ արժէք ու անձնաւորութիւն կը տեսնենք իր անձին մէջ: Այս անձնաւորութիւնը թարմ պիտի մնայ մեր հաւաքական յիշողութեան մէջ, իբրեւ ինքնագոհողութեամբ եւ ընկերային ծառայողի հանգամանքը արդարօրէն մարմնաւորող անձնաւորութիւն»: Վերապատուելին իր խօսքը աւարտելէն ետք, Մ.Ա.Հ.Ա.Ե.Միութեան Նախագահին՝ Վեր. Մկրտիչ Գարակեօզեանի, Մ.Ա.Հ.Ա.Ե.Միութեան Կեդրոնական Մարմինի ատենապետին՝ Վեր. Դոկտ. Փօլ Հայտօսթեանի ու Համայնքային Գործադիր Մարմինի ատենապետին անունով պատուեց Տիկ. Ա. Չոլագեանը արծաթեայ ափսէ յուշանուէրով:



Տիկ. Ա. Չոլագեան խոր յուզմունքով ընդունեց յուշանուէրը եւ իր գոհունակութիւնն ու շնորհակալութիւնը յայտնեց իւրաքանչիւր կողմի, որ իրեն նեցուկ կանգնած են 34 տարիներու տեւողութեան, իրենց խորհուրդներով, գործակցութեամբ եւ իրենց նիւթական ներդրումը բերելով հաստատութեան: Ան մեջբերում կատարեց Պօղոս առաքեալի խօսքերէն, թէ՛ տնտեսէն կը պահանջուի հաւատարիմ ըլլալ: Ան յիշեց, թէ՛ փորձած էր իր լաւագոյնը տալ այս գործին, յատկապէս հասնելու կարիքաւորին, անկարին ու տկարին: Ան բաժնեց նաեւ իր 34 ամեայ ունեցած փորձառութիւնները, նուաճումներն ու գործունէութիւնները, որ նպաստած են հայ ժողովուրդի վերելքին ի խնդիր: Ան իր խօսքը փակեց հետեւեալ Ս. Գրային համարով՝ «Ամէն բանի կարող եմ Անով (*Քրիստոսով*) որ զիս զօրացուց» (Փիլ. 4.13):

Տիկ. Ա. Չոլագեանի պարգեւատրումէն ետք Բժ. Պետրոս Տարագճեան՝ Հաւորարտ Գարակէօզեան Հիմնարկի Տնօրէն բաժնեց վկայութիւն, գոհունակութեամբ անդրադառնալով՝ Տիկ. Անի Չոլագեանի մատուցած որակաւոր ու իմաստալից ծառայութեան, ապա փոխանցեց իր սրտագին բարեմաղթութիւնները:

Ապա բեմ հրաւիրուեցան Հայ Աւետարանական Համայնքի Համայնքապետ, հովիւներ, ժողովներ եւ Տիկ. Ա. Չոլագեան՝ հատելու օրուան յատուկ կարկանդակը:

Ձեռնարկը վերջ գտաւ Վերապատուելի Համայնքապետ Յարութիւն Սելիմեանի առաքելական օրհնութեան աղօթքով ու բարեմաղթութիւններով օրուան մեծարեալին իր յառաջիկայ օրերուն համար:

Սեւան Չիրիշեան